

02/08/2001

70 jayakan kembara rentas Semenanjung

Anwar Patho Rohman

PUTRAJAYA, Rabu - Bermula hari ini sehingga 17 Ogos, 70 peserta Program Kembara Merdeka 2001 akan merentas Semenanjung dalam 10 kenderaan pacuan empat roda Jabatan Penerangan.

Semua peserta dilepaskan oleh Perdana Menteri, Datuk Seri Dr Mahathir Mohamad di Dataran Putra, Putrajaya pagi ini dalam misi menyerahkan Jalur Gemilang serta risalah sambutan kemerdekaan.

Destinasi pertama yang disinggahi konvoi itu adalah di Plaza Tol Sungai Besi dan Plaza Tol Jalan Kuching untuk diedarkan bahan yang dibawa.

Selepas melepasi kesesakan lalu lintas Kuala Lumpur, peserta berkonvoi ke Kuala Selangor yang menjadi daerah pertama kembara itu.

Konvoi `serba putih' diiringi polis pengiring, dan ada masanya pasti ada yang menganggap ia adalah deretan kenderaan Pertubuhan Bangsa-bangsa Bersatu (PBB).

Di Kuala Selangor, Ahli Parlimen, Mohd Sayuti Said sedia menanti konvoi untuk mengagih serta melekat Jalur Gemilang kepada kenderaan bertuah.

Selepas itu, peserta dibawa berehat di De Palma Inn sebelum meneruskan destinasi ke Taman Seri Setia, Dewan Undangan Negeri Sungai Besar di Tanjung Karang menyertai aktiviti anjuran K3P (Pendengar, Pembaca dan Penonton) Kampung Sungai Kajang.

Aktiviti sukaneka dan mesra rakyat diteruskan sambil menyaksikan seorang peserta kembara terseliuh lutut kiri kerana terlalu ghairah bermain sepak takraw..

Majlis penamat pada hari pertama adalah bacaan Yasin dan doa selamat di Masjid Al-Raudhah Tanjung Karang, yang dihadiri Dr Mohd Khir.

Esok, peserta akan meneruskan kibaran Jalur Gemilang ke Sabak Bernam sambil menikmati pandangan suasana kampung di selangi rumah sepauh papan yang dinaungi pokok kelapa.

(END)